

吳
中
人
物
志

吳中人物志卷之四

長洲張景春輯

曾公論贊

薦舉

晉

顧綜吳人明帝時辟有道歷御史大夫至尚書令帝以正月上日幸辟雍延綜為三老設几杖乞言受誨其後生雍雍從學琴書於蔡邕邕歎異之故字元歎弱冠州郡表薦為合肥長轉曲阿上虞皆有治跡子譚代雍為平章事孫榮字彥先南州士望朝野甚推

敬之

陸康吳郡吳人太守李肅舉孝廉肅後坐事誅康為
歟尸送喪還鄉行服以義烈稱除高成令州郡上其
治狀靈帝欲鑄銅人而國用不足乃詔民田畝歟十
錢康上疏極諫檻車徵詣廷尉坐免歸復徵拜廬江
太守獻帝時康蒙險遣計吏奉貢素術遣使求委輸
兵甲康以其叛逆閉門不通內脩戰備以禦之術怒
遣孫策攻康康固守二年城陷病卒朝廷愍其守節
拜子儁為郎中少子績

顧和字君孝榮族子也總角便有清操王導為揚州

辟從事咸康初拜御史中丞劾奏尚書左丞戴抗賊
汚百萬付法議罪并免尚書傳玩郎劉脩官百僚憚
之

陸曄字士光少有雅望機從弟也元帝初鎮江左辟
為祭酒以功封望亭侯與王導卞壹庾亮溫嶠郗鑒
並受顧命弟玩弱冠有美名與兄曄俱守宮城官侍
中司空

陸納玩弟也少清操貞厲絕俗州舉秀才累遷吏
部郎吳興太守至郡不受俸祿

陸徽字休猷吳郡吳人郡辟主簿遷益州刺史蜀土

安悅

蔡洪字叔開郡人有才名薦仕松滋今時王政陵遲
君子多退而窮處洪作孤奮論與王沉釋時論同行
于時嘗赴洛洛中人問曰幕府新開羣公辟命求英
奇於側陋採賢雋於岩穴君吳楚之士亡國之餘有
何異才而應斯舉蔡荅曰夜光之珠不必出于孟津
之河盈握之璧不必採於崑崙之山大禹生於東夷
文王生於西羌聖賢所出何必常處昔武王代紂遷
頑民於洛邑得無諸君是其苗裔乎有問秀才吳續
姓何如洪荅曰吳士季聖王之老成明時之雋義朱

永長理物之至德清選之高望嚴仲弼九臯之鳴鶴
空谷之白駒顧彥先八音之琴瑟五色之龍章張威
伯歲寒之茂松幽夜之逸光陸士龍鴻鵠之裴徊懸
鼓之待槌凡此諸君以洪筆為耒耜以紙扎為良田
以玄嘿為稼穡以義理為豐年以談論為英華以忠
恕為珍寶著文章為錦繡蘊五色為縉帛坐謙虛為
席薦張義讓為帷幕行仁義為室宇脩道德為廣宅
吳震郡人學行清脩老而未調華譚薦之為著作侍
郎

徐原字德淵慷慨有才志忠壯好直言呂岱薦為侍

御史岱有得失原輒諫諍原死岱哭之曰德淵岱之益友也今已矣岱復於何聞過焉

唐

張承休吳郡人曾祖冲祖後胤承休初以南郊齋郎補兖州兵曹丁母憂廬墓三年又舉賢良方正遷揚州司錄參軍移蘇州常熟令歷政皆有賢名終開元二年張說為其銘

宋

錢藻字醇老吳越王元瓘子儼入朝為昭化節度守和州儼生昭慈昭慈生順之藻順之子也舉說書進

士又舉賢良方正皆中其選英宗時為祕書校理三
上書請慈聖光獻太后歸政天子神宗時稍遷直舍
人院同脩起居注知開封府以慈恕簡靜為體不求
智名以投世取顯為屬者有不合而遇之無厚薄意
黃挺字公操浦城人紹聖中丞相章郇公薦其才為
吳縣尉歷秀州司理杭州餘杭尉筠州判官年未六
十告老守太子洗馬致仕家於吳知州章岵為十老
會挺其一也

龔頤正字養正歷陽人父為華亭今遂家吳中淳熙
末洪景盧領史院奏授下州文學補迪功郎光宗受

二
禪用薦者主管吏部架閣文字遷太社令宗正寺簿
嘗著續稽古錄

楊紹雲吳江震澤人中書邦弼之孫寶慶三年辟任
忠義統制兼淮東制置副使陞禮部侍郎

郭章字仲達崑山人早遊太學有聲于時因歸省以
詩別同舍有掠短綠蓑驚脫兔踏翻紅葉開歸鴉又
云中原百戰知誰運今日分陰自等閑之句以守成
功拜官被薦居帥幕官至通直郎

李逢昌字子明常熟許浦人蔭補迪功郎改淮東制
司魏了翁時制閫議復通州城以軍券為慮檄逢昌

糶百萬緡旬月事集了翁以練達舉之丘岳趙范爭
辟致逢昌歷桐城清流二縣令辭疾歸立義莊贍族
人號長者子淵博雅好古仕蘄州路總管

元

章德剛吳江人至正中薦任崑山州學正有詩名
蔣堂字子中早從學永嘉林先生寬泰定三年江浙
鄉試第三人有文譽累辟不就隱居吳中四方受業
者甚衆後以太府薦授嘉定儒學教授終于家

孟潼字宗鎮吳人宋信安郡王五世孫以茂異膺憲
舉為文學掾累遷至承直郎松江府判官致仕性謹

厚平居恂恂未嘗少懈為文本於理致所歷官守率以廉能稱

陸德原字靜遠長洲人初舉茂異郡守趙鳳儀請于中書省祠唐陸魯望創甫里書院以德原為後人署為山長陞徽州路儒學教授徽學久廢德原改作一新多發私橐以助工役先是長洲邑庠及吳中書院多其脩葺之力又嘗於笠澤建義塾延虞勝伯為師刻四明程端禮進學日程以惠淑來學

姚文魚字子章崑山人辟授浙東帥閫掾博通經史尤工於詩自號婁東生家有野航亭書聲齋

范文英字彥材文正公八世孫辟授紹興路教授過
故人曾小隱於旅次貧不能歸謂代文英滿秩文英
曰我耄矣無能為也子其行之乃遺以袍笏復為之
贐文英尋以將仕佐郎平江路學教授致仕以祖規
次當主奉請于朝建文正書院

國朝

陳則字文度洪武七年由秀才舉任應天府治中轉
戶部侍郎左遷大同府同知陞知府事則有詩名嘗
與高啓徐賁輩唱咏為友

王震字子東宋參政絢八世孫父祖卿洪武初為行

人開雲南路夷山湮谷其功居多又絕僧寺狐妖震
以秀才應辟除益都令遇歲飢發倉賑民賴多全活
沈廷芳崑山人材貌偉碩讀書知大義洪武中由茂
才舉初授觀察使改北平布政司左布政使

馬達字伯行吳江簡村人洪武中徵人材授合水縣
丞轉昌邑為政廉平人不敢以私麓衣糲飯淡如
也其妻乘間言居官而貧如是伯行怒曰爾欲使我
為善耶欲使我為非耶妻不敢復言

尤義字從道本欽姓初名裔尤蓋外族也元末辟為
樞密掾洪武中薦為湖廣布政司經歷居官清慎見

稱早擅文翰與陳基相友善基當亂離之際以白金百兩託義時平橐而還之基感其誼將中分焉義堅却竟歸于基人多德之有遺崇歲于家子安禮

王謙字鳴吉洪武初聘為常熟州學訓導同時有王達守道黃進德晉之馮章甫吳乾廷彥皆吳人亦任訓導又以才行著名

錢芹字繼忠吳越王之裔祖父皆仕儒官芹少負氣節與論天下事終日不倦元季兵興四方守臣各擁衛境上芹屢入戎幕謂諸將真有為也 國初辟大都督府掾從大將軍魏國公北征而還居故南園授

徒自給凡二十餘年洪武末詔求遺逸郡守姚善以
芹薦留議事中禁授戶部司務值北陲有警以芹署
行軍斷事赴真定從征虜將軍咨謀馳驛入奏道遇
疾不能趨朝封章以進猶手書上執政大臣懇懇邊
事緩急遂卒歸葬于吳

梁時字用行長洲人洪武間由明經舉為岷府紀善
後改翰林典籍預脩大典所著有噫餘集

黃本字中父郡人家綺川洪武中舉明經為武夷訓
導歷會昌教諭有文名

葛天民江陰人元末避兵長洲入國朝洪武二十

四年辟人材授大理府同知辭歸教授于鄉天民通
易學嘗賣卜江湖上以養親全其志所著有野樵遺
響一卷後卒葬于下雉瀆

史公謹世居太倉善詩尤工繪事弱冠從軍滇陽洪
武末有薦其才授應天府推官未幾左遷湘陰丞後
僑居金陵自號吳門野樵以壽終有獨醉亭詩集行
世

楊性字夷中早有才敏超出行輩從會稽楊廉夫游
當時廉夫以鑊笛道人為號故又自稱為老鑊而人
遂以小鑊稱性復作草玄亭洪武中以秀才舉知祈

州

偶桓字武孟崑山人洪武二十四年應秀才舉為荊門州吏目所著詩有江雨軒集

吳復字孟脩吳江簡村人洪武中辟人材授湖廣僉事工詩有雪區集弟頤字希程從外氏史姓亦以舉薦授本縣儒學訓導所著有桃溪集

陶振字子昌吳江人楊廉夫門人有才名長於詞賦洪武中舉為本學訓導以事謫戍嘗進紫金山金水河二賦稱旨復命賦飛龍在天賦遂赦之陞安化訓導

曾曰章初名燿後以字行吳江人洪武間舉秀才為黃陂令擢翰林院侍讀永樂初奉使交趾尋從西平侯出征沒于軍中

吳文泰字文度吳縣石湖人與丁遜學並有詩名于時洪武間文泰以才薦為涿州同知後坐事去官有愚菴集

郁新吳縣人洪武二十一年生于西橫山下家素饒財慷慨豪舉喜賓客樂賑窮乏以人材命為戶部度支主事考滿擢尚書投資善大夫永樂三年薨於位葬臨淮解縉學士為銘

劉以禮字德讓先汴人祖順之仕平江路權茶提領
因家于蘇為長洲人以禮學識該博儀狀偉然洪武
初以明經薦授沛縣儒學教諭時沛學宮久廢以禮
力為脩葺舉鄉人張倫為訓導相與共協教迪一時
士子多登科甲卒于官門人請祀于學子二敏字孟
功以善書徵授德清令鋤強植善民甚懷之歷中書
舍人政字仲理

夏時字達中長洲人治春秋性至孝隱居行義傍通
醫學得浦江趙以德之傳永樂間以經明行脩舉任
本郡儒學訓導秩滿赴京以醫留用太醫院卒

朱吉字季寧德潤子洪武中以才薦授戶科給事

太宗即位復轉中書舍人奉勅題高廟神主卷賞

特厚年八十餘終所著有三畏齋藁

沈丙字南叔以才薦授福州閩清縣令所著有白雲集子餘慶禮部主事

鄭宏字以純嘉定人早從嘉禾鮑仲孚通易學洪武初舉秀才授禮部郎中病告歸門人授業者甚衆永樂間嘗典湖廣福建文衡所著有味易齋稿

許原讓字克謙家郡城望齊門北當張氏據吳時以不仕隱處終身洪武二十一年朝廷選戶家補京官

原讓得拜戶部度支員外郎辭不受祿其事行詳見翰林學士劉三吾所為葬銘

沈玠長洲周莊人洪武初以人才擢奉訓大夫戶部倉曹員外郎不受祿繼有旨願受者聽玠辭曰臣玠誠不敢以富饒故妨諸戶家念臣一門屢蒙恩宥保有妻孥田廬已踰素望又居尊官榮逮父祖敢更受祿哉叩謝至再初吳中首稱沈氏曰萬三公萬四公昆季以力農致富埒古素封者其稅率先兩浙戶家輸其稅者萬上嘗嘉歎後復獻白金以佐國用上曰爾心誠忠意誠厚第繫天下觀望萬一人人相

傲是啓利原一有不做人必不自安我富有天下政
不少此善而却之比任海內戶家為京官六曹近侍
各舉所知惟玠簡在帝心故首擢是職玠為萬四公
曾孫

莫禮字士敬宋廣德知軍子文七世孫洪武二十年
以人材授戶部員外郎與同官沈玠王公讓等十人
辭祿即陞左侍郎後坐事卒官

練墳字聲伯更名則成洪武中拜左春坊司直郎充
東宮講官時糾開尚書不法事陞河南道監察御史
既而為嫉者所忌調雲南廣西府推官卒于治所年

三十七練之先浦城人徙于睦世有顯宦父士章以海道萬戶府掾晉遷于蘇之尹山故今為蘇占籍云施忠義字景仁長洲人洪武中以人材薦授建寧知府僅三載謫戍龍山後以老疾歸卒葬鄉之尹山竇德遠吳江人洪武初徵授禮部郎中陞侍郎致仕子昇亦以才徵為縣丞父子俱有文名

徐衍字仲易吳江秋澤人洪武中以人材授工部主事有詩集

崔齡字大年吳江泮溪人洪武二十一年以人材拜刑部主事上䟽辭祿以清慎稱後坐黨禁

葛德昭吳江人洪武中以人材拜刑部員外郎子芳亦以才授禮部員外郎同坐黨禁

衛靖字以嘉崑山人永樂間秀才舉脩大典授中書舍人直文淵閣陞禮部主事預脩宣廟實錄靖居內閣日久累受賞賚以謹厚受知楊文貞公

吳驥字材良吳江同里人洪熙元年以明經舉授儒學教諭屢膺山西河南校文之聘致仕以高壽終嘗著同里先哲記

許思溫字叔雄世為邑人祖父皆好善樂施思溫素朴少直居吳山下學朱氏詩貢曹監詔選材於六堂

思溫在首選署刑部郎中改除御史以守城功陞吏部左侍郎

章珪字孟端常熟人宣德中應詔授廣東按察司知事陞御史有能名後以子貴累贈副都御史

丘方字仲野常熟人宣德中舉賢良授江西泰和丞有文學楊文貞公嘗贈之詩云南平丘少府清澈玉壺氷解官歸以鬻文自給

趙宗文長洲甫里人永樂五年賢良徵授鄱陽縣令有詩名弟宗禮仕至禮部郎中

鄒亮字克明長洲人少有文譽正統初巡撫周公及

知府况公皆知其名將薦用之有毀之者揭匿名書于府門况公見之曰是趣吾薦之也即日具疏以上獲授吏部司務尋陞南京浙江道監察御史卒弟順字克和仕至辰州守

王肄字敏道長洲葑門人正統中以賢良舉為湖州安吉縣丞解官歸受徒為業其先居有東郭草堂王文靜汝玉嘗為記

張緒長洲人定德末以精通書算舉為縣令歷廬陵知府

周綱字文叙郡人正統間御史成規薦授柳州融縣

丞融在柳州為大縣城下江即牂牁江也江之上流
與王江合王江之間群獠居之又其上流群蠻居之
撫御一失輒為民害故融自昔號為難治綱始為融
丞以服其人遂知縣事綱卒子奎以行能聞都御史
韓公奏授本縣丞

沈應字德乾辟入文華殿說書除江西左叅議復轉
山東善詩有東礪集

葉德潤吳縣洞庭東山人洪武初人材為陝西布政
司理問後徙汾湖為甲族時汾湖有陸行直字季衡
以人材徵授翰林典籍有問訊海棠詩

論曰政之治亂必慎所舉明駁推轂此則君子之所
宜有而非所以為君子者也漢有秀才異等輒以名
聞公府郡國皆薦士之路賁束帛于丘園剖連城于
井里尊儒貴學何代不然陳平雖賢須魏倩而後進
韓信雖奇賴蕭公而後信必俟饋樂以釣由余尅像
以求傳說不亦煩乎故臧文不智失在降賢言偃得
人功由升士後代得位之徒依寵驕士藉勢陵賢欲
使志義之士匍匐曲躬以事已毀顏諂諛以求親然
後乃保持之則貞士採薇凍餒伏死岩穴之中而已
爾豈有肯踐其闕而交其人者哉無惑乎位益高者

罪益深志彌潔者身彌賤也乃若專車之骨昔出於
吳江南之貢比于竹箭彼稱驥之足不薦文人之手
者無論矣亦有薦而不至至而不屈者樹非梧桐而
望鸞鳳降翼器非曹公而冀蓋公枉駕是故都尉掃
灑其門猶惧辱焉東吳薦舉之士若蔡洪荅洛中之
問言盡詞鋒徐原蒙呂岱之知事皆針砭孝子若承
休何忝賢良之詔長者如季逢寧慚練達之名歛尸
送喪陸康報李肅之推劾奏賊污顧和副王導之辟
名掛于白簡事染于丹青非曰忝徒勞之職執城旦
之書而已觀曄之並受顧命玩之弱冠知名納之不

受俸祿微之蜀王安悅煌煌陸氏代稱有人有明松
一寰宇得人為盛秀異之貢吳復居多况守之薦鄧
亮以毀言而激成視夫心欲崇高則起家喉舌之任
意須屈抑必白首即署之官者可同年而語哉人材
之選理瑾昆弟與焉華萼相輝亦為難兄弟矣汾湖
葉公德潤則先比曾大父也亦附于傳若滋水之氣
者耶

贊曰丹穴奇毛天朝羽儀緇衣在好狐白能披開道
下風稱珍席上皓質冰鮮好音玉響岩壑丘園蒲帛
弓旌金金友誼貧違嬾情卜因官賣薦以毀成穿楊

振翼舉燭流聲

志卷之四

吳中人物志卷之五

長洲張景春甫輯

曾孫獻翼論贊

宦績

漢

郁史君吳人少以雄才見稱漢惠帝聞其名下詔徵之拜雍州刺史為政得體卒為立祠

沈豐字聖通郡人漢永平中為郡主簿歷零陵太守為政慎刑重法罪人詞訟初不歷獄嫌疑不決一斷於口鞭朴不舉市無刑戮僚友有過亦不暴揚有奇

謀異略輒為談述曰太守所不及也在郡有紫芝甘露去之日民為立祠

韓崇毘陵人仕宛陵令行仁以為政用道以撫民虎狼深避蝗不集界遷汝南太守授書佐袁安安後位至司徒以崇有識物之鑒陰皇后葬京師近都二千石妻當會園陵而崇妻居清素妻忿崇哭泣詔問其故太常馬奚谷曰汝南太守韓崇清苦遠尚味道忘形身享重官而妻自紡績政化仁簡視民如傷深達奇博有君子之鑒妻不通寒儉之節哭怨無衣適足以顯崇明德耳上奇之加崇俸祿秩中二千石後明

帝巡狩汝南上治崇府崇使妻出住孤獨老嫗家上聞歎曰韓崇所謂百煉不銷也賜縑五十匹崇在郡十四年政化洽著舉天下最年七十四入大霍山受王瑋玄遁化泥丸紫府術以度世後為華陽洞中左理中監吳郡志作李崇在仙事傳

徐栩字敬卿由拳人少為獄吏執法詳平為小黃令時陳留遭蝗野無生草過小黃飛逝不集刺史行部奏栩不治栩棄官蝗應聲至刺史謝令還蝗即復去又為長沙太守嘗食乾飯不發烟爨

陸法真郡人也宋孝宗時歷官有清節嘗為劉秀之

安北錄事參軍太山羊希與安北咨議參軍孫詵言
曰足下同僚比有陸錄事者此生東南名地又張玄
外孫持身至清雅有志節年高官下秉操不哀計當
日夕相與申意

陸納字祖言吳人少有清操貞厲絕俗為吳興太守
至郡不受俸祿將應召外白宜裝幾船納曰私奴裝
糧食來無所復須也臨發止有被襖而已其餘並封
以還官謝安嘗欲詣納而納殊無借辦其兄子儼不
敢問之乃密為之具安既至納所設惟茶果而已儼
遂陳盛饌珍羞畢具客罷納大怒曰汝不能光益父

叔乃復穢我素業耶於是杖之四十其舉措多此類
陸逞字季明初名彥字世雄魏文帝嘗謂之曰爾既
溫裕何乃字世雄於爾兄弟又復不類遂以焉逞幹
職詳明歷仕三府所在著績還居近畿詔令路車儀
服郊迎而入時人榮之都界有豕生數子經旬而死
其家又有豮遂乳養之以活時論以逞仁政所致
陸閔吳人聰明有令德選尚寧平公主辭疾不應為
潁川太守致鳳皇甘露之瑞閔咨容如玉喜著越布
單衣光武升臺見而偉之嘆曰南方固多佳人自是
常勅會稽郡獻越布焉

張裕曾祖澄龍驤將軍敝子也出為都督廣州刺史
平越中即將綏靜百越嶺外安之弟緯

南齊

顧憲之字士思吳人未弱冠州辟議曹從事舉秀才
宋元徽中為建康令時有盜牛者與本主爭牛各稱
已物二家詞證等前後令莫能決憲之至覆其狀乃
令解牛任其所去牛徑歸本主盜者始伏其罪時人
號稱神明至於權要請託長吏貪殘據法直繩無所
阿縱性清儉為政得民故都下飲酒醇旨者輒稱為
顧建康謂其清美焉仕齊為衡陽內史先是郡境道

歲疫死者太半多棄之道傍憲之分命屬縣悉令瘞
葬又土俗民有病者妄云先亡為禍即為發冢剖棺
水洗枯骨名為除祟大為風俗傷敗乃諭而止之時
刺史王奐至衡陽獨無訟事乃歎曰顧衡陽之化矣
若九郡率然吾將何事永明四年為隨王東中郎長
史行會稽郡事山陰人呂文度有寵於武帝嘗立邸
舍於餘姚憲之至郡表除之後文度葬毋郡縣爭赴
憲之若不聞文度心雖銜之卒不能傷也時司徒竟
陵王於三縣界立屯封山澤禁民樵採憲之固陳不
可言甚切直王命已之雖累經宰郡歸無擔石之儲

不免飢寒嘗為衡陽郡記

唐

魏信陵吳縣包山人貞元初進士及第為舒州望江
令有仁政嘗為禱神請雨文有云必也私愆之求行
於邑里慘黷之政施於黎元令長之罪也神得而誅
之豈可移於人而害其歲既卒官百姓留葬邑境至
今有祠

陸璣字仲采郡人舉明經補長安尉以清幹稱開元
初改新鄉令人為立祠用按察使宇文融薦遷澠池
令累官兵部郎中東嶺騎使還除洛陽令時車駕在

洛摧勒姦豪人莫敢犯為中書令蕭嵩所器重嵩羅
丞相俾陰廉嵩短瑛曰與人交過且不言况無有耶
以是忤貴近出為太原少尹累陞西河太守封平恩
縣男屬邑多虎前設檻穽瑛至徹之虎不為暴

顧少連字夷仲吳人舉進士為禮部侍郎薛邕所器
擢上第以拔萃補登封主簿邑有虎孽民患之少連
命塞陷穽移文獄神虎不為害有薦為監察御史德
宗幸奉天徒步詣謁歷吏部侍郎裴延齡方橫無敢
忤者嘗與少連會田鎬第酒酣少連挺笏曰段秀實
笏擊賊臣今吾笏將擊姦臣奮且前元友直在坐勸

鮮之改京兆尹政尚寬簡先是京畿租賦薄厚不一
少連以法均之遷吏部尚書封本縣男徙兵部為東
都留守表禁苑及汝閑田募耕以便民閱武力利鎧
仗號良吏卒贈尚書右僕射謚曰敬子師邕字睦之
累官監察御史事詳韋夏卿神道碑

沈傳師字子言吳人治春秋上書有楷法官至吏部
侍郎太和初卒贈尚書帑無儲錢鬻宅以葬

宋

范琪仲淹從兄字希世寧國節度推官冒言之子也
天聖五年進士歷鄱陽保信軍廬州二從事葉清臣

舉充茶官授開封府法曹議讞必精握節不撓薦陟
大理寺丞知明州鄞縣葺隄埭百餘決導渚積轉運
安撫司各條其治狀舉簽州幕遷殿中丞太常博士
知常熟關金涇鶴瀆二浦田千頃為公家利除尚書
員外郎通判泰州卒子師道自有傳

范仲溫字伯玉仲淹仲兄景祐中以仲淹恩例補將
作簿調新昌尉監餘杭縣稅遷寧海節度推官慶曆
七年知黃巖縣會海潮壞州城人民淪溺者甚衆仲
溫教民為桴全活萬人既而董役治城慮人築且勞
壁不能久乃集民累土以牛數百蹂之堅而後增復

表以長石互相銜枕勢莫得動門皆設闌遇水暴至則障之衆服其善台人遂安秩滿以太子中舍致仕卒葬天平山仲淹為之銘子有文天聖間宋庠榜及第省試有文早世無子仲淹聞有遺腹子在外亟往求之兩蜀間曰吾兄異於人體有四乳是兒亦必爾已而果然名曰百常後以恩澤官之

崇大年字靜之慶曆中擢第歷知青田縣民病無以納和買大年悉令候冬熟州符督責追杖縣吏大年曰年凶民苦催督必破產雖杖胥吏三五輩尚可寬一邑之民至冬民輸無不足者徙知浦城縣舊誤兩

棧民以事追去無輕重悉置棧中大年曰此以牛馬
吾民也悉命撤去以疾乞分司歸吳日與程公闢諸
公燕遊號吳門十老大年德中淳固志尚夷曠辭却
薦辟浩然勇退綽有賢稱卒年八十二鄉人議謚有
曰黔婁辭國有餘富其謚康陶淵明隱約求閑其謚
靖節大年當有道之世秉難進之節韜章蘊能不自
表襮仕而知止貧而無憂凜然古高士之風因謚曰
康靖先生

徐師閔字聖徒父奭通判蘇州治平初師閔為虞部
員外郎知江陰軍熙寧十年以司農少卿知袁州時

江西有劇賊詹遇所過屠劫列城為之騷動袁獨預
修武事具戰艦號令嚴肅常若寇至遇引去不敢犯
境袁民歌之且有瑞麥嘉禾之異繪圖以進為治鎮
靜有惠愛吏民生為立祠

邾賈字正夫崑山太倉農家子童年嗜學識度不凡
登嘉祐二年進士崑人自國朝登科者自賈始初授
睦州團練推官知杭之於潛縣未赴熙寧三年會詔
天下陳理財省費興利除害之策賈自廣東安撫司
機宜文字為書陳蘇州水利丞相王安石善之授司
農寺丞提舉興脩兩浙水利民不為便罷歸治所居

之西曰大泗漕者如所陳之說為圩岸溝洫井洧場
圃俱用井田之制歲入甚厚圖狀以獻且以明前法
非苟然者及水之利害著書行世子僑字子高亦有
材局王安石器許之見於詩篇有幼成警悟集孫升
卿字師古紹興進士知常徽二州乾道六年自徽代
還奏蠲本州額外剝科雜錢萬餘緡及江東兩湖運
司絹匹萬餘其恤民類此

孫載字積中曾祖漢英仕錢氏為崑山鎮防遏使遂
為崑山人登治平二年進士知考城縣一日巡尉來
告盜集境上將以上元掠近郭至期載張燈樂飲許

民嬉遊不禁夜如故事盜叵測遂遁去迄受代無鼠
竊者後歷廣東河北淮西使者知海沂婺亳州治務
大體時號循吏以嘗薦元祐黨人乞祠以歸

郭附字明仲郡人嘉祐八年進士知洪州新建縣俗
健訟好持吏短長附至問民疾苦皆以鷙獸暴橫為
言乃檄旁縣尉併力仍厚啖壯士果得鷙獸數十尸
諸庭號於衆曰有悍不率教如此獸者皆殺之無一
人敢犯令熙寧中知崑山縣以朝奉大夫致仕

鄭景平字晞尹熙寧三年與父伸同登進士嘗為大
理官每有疑獄中夜祈禱務得其情而已既而歸老

家居朝廷以其能復召起知饒州數月而歸或問其
故荅曰天子命景平為郡以撫字為職乃不得行其
志今日湏金若干明日湏粟若干民已枯骨矣捶考
之亦何所取景平安得不歸時朱勔暴橫從之者甚
衆獨景平始終無所阿附其居官剛正不撓廉介如
此

徐鑄字元鈞年少入官有能名政和初提舉兩浙常
平脩松江隄易土以石闢常熟水田數百頃為之彊
畝越四年知杭州杭人安其教令

徐藏字子禮林之子鑄從孫也初命知饒州藏居吳

懼去親遠奏易旁小州以便養乾道初改知江陰軍
至則作新庠學詔遣轉運副使姜詵按視水利歲延
見父老審訂其說謂其地北臨大江其勢洿下港瀆
善淤夏秋淫雨浙西數郡百川並委瀕港七鄉並湖
三山低卽之田混為一區尋丈而增膚寸而落十年
之間沒者一伯六十餘萬畝歲蠲秋苗以一二萬計
公私病焉遂請治蔡涇廢牐牐之故基距河差遠兩
翼迫蹙波流悍急易於潰壞乃移基並東直抵漕渠
斥而大之易木以石於是增浚漕渠下通黃田以防
泛溢絕壅滯五旬而畢又奏本軍地狹民貧有續添

認納臨安府買紬絹四千餘匹兼累遭大水百姓憔悴因此重斂上為蠲八之五命下之日歡動阡陌藏善漢隸書弟兢

兢字明叔生數月輒喜字十餘歲穎異不群人謂駘省後身也以父任補通州司刑曹事辟入司幕攝事雍丘民服其化移攝鄭州原武縣時有挾其弟貴勢者威震郡邑檄邑治市炭後至與慢令者兢歎曰令不能庇民其忍至此極耶乃疏其害聞諸朝願以身贖無辜鄭燕公謂同列曰使縣令皆如徐兢天下其有不治乎宣和中以禮物官隨路允迪使高麗授高

二
一
麗圖經四十卷上徽宗覽書大悅召對便殿賜出身
兼掌書學以篆名家

孫冲字子和熙寧六年進士少負才名受知于王荊
公嘗著鄉黨傳說二論甚奇之後出宰和州含山縣
號為循吏其律已甚嚴一毫不妄取秩滿率家人解
其婦裝時有老獲畜一砧冲視之曰此非吾來時物
也命還之卒年三十五無子以姪畋為後

錢佃字仲耕進士歷官臨安尹擢吏部郎中對便殿
言三事上稱善累遷吏兵工三部侍郎出為江西路
轉運副使繼使福建再使江西奏蠲諸郡之逋淳熙

八年婺州饑且缺守上曰錢佃可為郡既至禱雨鬚
髮為白勸分移粟所活七十餘萬口政甲一路時提
舉朱仲晦與陳同父書云婺人得錢守比之他郡事
體殊不同及作江西漕司養濟院記謂其嘗奏免贛
吉麻租二十四百五十九斛兩州之人猶歌舞之婺
州救饑之政亦為諸郡最佃嘗買田合族名曰義莊
有易解詞科類要并文集

鄭作肅字恭老宣和三年進士紹興五年知常州先
是唐獨孤及為刺史時有甘露降于廳事作肅因初
凝露堂自為之記歷知吉州還朝奏郡中歲輸黃河

竹索錢河久陷錢何從歸乞賜蠲免其他循襲者亦乞盡除高宗嘉納其言且諭丞相秦檜稱獎再三檜怒諷以在任不法獄治之檜殂得免又知湖州孝宗即阼之二年歲歉民貧有生子不舉棄於道傍作廩令屬官收取令乳母為之養月給米贍之

王可大郡人嘉泰中知武岡軍有惠政俗多信機祥而不喜醫藥往往殞於非命可大憫之乃以成無已傷寒名理論藥方說許知可傷寒歌刻惠是邦民賴以生

王圭字君玉崑山人范文穆公外孫登嘉定十年進

士為處州松陽縣主簿以才幹陞為令講行經界法
為天下式淳祐間出知常州以職事脩舉入為司封
郎中終朝奉大夫有文集

朱天錫郡人嘉定間知丹陽縣能撫字百姓留意學
校邑人為立生祠移知武進擢台州守

林璞字伯振長洲人乾道中與弟琰同舉進士為長
興簿嘗語人曰為己害人吾不為也及知武昌縣有
云交代有子孫之契不宜交惡金穀儻有虧欠當即
與交頭無令滯其批書時人稱其長厚

王棠字子思紹興五年以左朝奉郎知江陰軍請立

學官教授給田以養士遂詔范雲充教授棠又刻春秋三傳于學雲亦篤意訓率風俗為之大變又請於尚書截留秋苗以為軍儲其略謂江陰為屯戍之地而庫無儲金廩無餘粟金藉內郡撥發錢穀以實邊壘今本軍之賦稅僅足以充歲額之上供而利源不足以給按月之發納一錢一粟皆赴漕司其後民力益困則群譟而越訴前後官吏以充借不敷卒得罪囚繫者相踵也然棠設以罪逐何足筭哉誠恐上誤國家邊備雖死無益愚昧輒欲仰干鈞慈特賜詳酌截本軍秋苗一二萬石每歲椿留準備緊急支用候

至次年新苗入倉却將陳米起發其於漕司歲計並無虧損直遲速之間耳所蒞本軍常有儲積以備不虞其他善政率多類此

顏度字魯子唐魯公兄子顥為常熟令其後遂為吳人度居崑山以文章政事名一時歷通判海門簿台州臨海令民有去思乾道五年知長興遇事慈恕以善惡福應之說諭人人不忍欺其聽訟能於淳朴中時出智計以得其實聞者稱為神明一日某王自寧國入朝舟次縣界皆以婦女執役王怪問之皆云顏公愛惜民力縱男女耕種卒難召集恐累顏公故婦

女悉當其役泊入朝孝宗問卿治郡得人乎即以度對未幾召拜監察御史度與朱熹友善孝宗謂度每出言不動如山人因以如山為號云

趙公豫字仲謙自父少卿家常熟歷知仁和餘姚縣分差鎮江糧料院詔有察辭避之真性全始終之大節之褒語陞寶謨閣待制致仕公豫居官廉正當言吾求為循吏不求為健吏也平生有燕堂類稿五卷奏藁一卷弟公升公頤仕皆至麾節

陳字字伯受古靈先生諸孫自宜興徙常熟以父廕為莆田尉得劇賊當受賞字歎曰吾不藉人命以階

仕進卒辭之調紹興府司法改知富陽徙知房州婦
字居官廉潔無玷母喪鬚髮盡白撫愛諸弟食必同
席俸祿不入私室嘗自謂豈惟富不可求亦所不願
也

莫子文字武仲吳江人知嘉興縣攷滿候代間奉使
王疇迎合當路意峻行括田之令子文不從使以為
抗朝命降宣義即責詞有云勤撫字拙催科賢者之
常也爾為令切切愛民乃不能汲汲赴功坐是為使
所劾降爾一秩非朕得已然亦因是得以知汝之為
人仁矣越五載復原官又詞曰君子之仕利與鈍亦

何常之有彼迎合希進之儔乃欲常利而無鈍然至
於時論卒亦不能有其有也可歎矣頃奉行田令者
倚法而逞爾制邑且受代乃能力抗其鋒期以不擾
留遺所附民雖主計之臣請黜爾朕不爾忘也五年
之踦於今而復前日利鈍之間所不得而常有者顧
非可常之道也士所當為不止此其並勵所守以副
朕擢試之意

元

干文傳平江人祖宗顯仕宋累官承信郎文傳少嗜
學十歲能屬文延祐初進士同知昌國州後知吳江

州廉平有聲治行為諸州軍召為集賢待制以禮部尚書致仕、

國朝

盧熙字公暨崑山人洪武四年詔起丘園之士分職中外熙為睢州同知時中原兵革甫定遺民無幾歲復荐饑到官之日一意休息惟恐不逮不敢輕以民力立事幸功也明年熙行守事時御史銜命來搜訪舊軍所至陵轢藩府鞭笞長吏悉籍見民為兵州近千人檄州拘送熙召民始自實得嘗隸尺籍者數十人昇之侍御怒械繫曹吏必盡得乃已不然且以沮

格上奏熙曰吾守民吏也民散吾誰與處即自詣奮
曰州已無籍軍今民且散走獨有同知請以充役侍
御怒斥去卒無以奪民賴以安熙平居恂然貌不自
持其當官有守如此其兄公武嘗寄詩有薺鹽清夢
鍊石古心之句卒之日貧無一金之藏官為具歛逮
櫬行吏民輓哭數百人道遇大雨無一人少却雖野
夫田老咸為制服

呂昭字克明洪武中徐州訓導由上封事授浦城縣
丞在縣多善政於民嘗植雙松于庭以甘棠擬之後
陞山西沁州知州屢聘校文預脩永樂大典其在浦

城赴召時父老各持鈔相贈悉謝一無所取至杭已無買舟之金抵家以新穀二斛償之及得沁州之命時天寒體無綿過徐舊嘗授經門生共為買一裘并驢一頭以行其廉貧如此

袁政字文理吳縣人湘陰縣典史有善政用治水夏尚書薦陞遂安縣令未視篆宿於驛亭夢小兒數十輩皆血淋漓者挽縣令衣覺而問諸父老荅曰此邑家生女不舉恐為資粧所費故也即日下令嚴禁之後邑中所生女皆名袁留

趙彥可崑山人洪武初任山東臨清知縣公勤寡慾

愛民好士妻嘗受民賂彥可覺之以所賂之物逕白于府箠其妻而遣之

文林字宗儒其先衡山人世為武胄大父從其兄兵中署散騎舍人來浙江因家長洲父洪鄉薦授涑水教諭林舉成化壬辰進士除永嘉令有旌能改知博平召還朝補南京太僕寺丞太僕政久弛弗振吏不奉法林奏按其罪遂著為令林尤盡心馬事深究其法叙古今事宜論畜牧之計上馬策三篇異其行尋移疾歸歸凡六年不起溫人以永嘉舊政請于朝以為守林抵廟堂書力辭不果遂以單舟赴任至之日

首釋繫徒千人郡多盜訟俗尚鬼好溺女悉為科條
處分莫不備善郡獄屢空前後所毀淫祠殆盡作旌
範訓其民禾生駢穗凡連上七疏皆賦役章程不可
已之事中一疏以災異自劾求退而論鎮守剥民尤
切以疾卒于官

徐有貞吳郡人夙負高才談鋒文氣並英邁在章秋
治水久未就功問於王尚書來尚書曰分水勢尋水
源有貞於是先開數渠引水散各支流去再三求發
源處不得乃授以物使人離數十里俟之物復浮出
如是者數處有貞曰水流則不受物源不在是再投

之一處不浮曰此乃真水源也百計塞之莫效聞一僧有道有貞就徃謁之問徃僧不言強之但曰聖人無欲有貞婦思而不得數日忽悟曰此下殆有龍窟耶龍所欲者珠也吾能使之去於是鑄長鉄柱洞釜底貫而下焉水始受塞不踰時遂成平陸盖鍊汁能蝕珠龍愛珠故去也後封武功伯援毫數行輒重購收去

韓雍字永熙長洲人弱冠為名御史兩廣蠻賊不靖拔公徃伐追斬至大藤峽威名大振賊悉遁去以身為南中巨鎮至沒猶餘威懾人

論曰張官置吏不為大夫苟中心圖民智雖不及
必將至焉有聞道而好為家者一家之人也有聞道
而好為國者一國之人也當官理行兩漢最盛美錦
不宜濫裁官位亦不後物六朝三唐而下鄉里衣冠
未嘗乏賢與龔黃卓魯同載在二尺四寸有時先事
有時先政有時先德有時先恕便辟無威于國道途
無行禽疏遠無蔽獄孤寡無隱治而宦績彰彰矣夫
世不乏于德猶歲不絕于春也國猶是國民猶是民
謂世衰難以德治可謂歲亂不可以春生乎紫芝生
于零陵昭沈豐之異績鳳皇下于潁川紀陸閎之英

規妻怨無衣明德適以顯崇姪陳盛饌素業乃復穢
我醇酒名為建康廳事却以疑露顏佛子之惜民力
鄭景平之職撫字陸瑒顧少連之回虎徐栩之去蝗
沈傳之鬻宅孫子和之還砧使縣令皆如徐兢天下
有不治者乎求為循吏不求為健吏趙公豫有焉開
國以來盧熙自請充役呂昭買舟無金遂安之地名
女為袁習臨清之令遣妻子于民賂禾生駢穗再見
文林視他邦之龍見不雙芝生無二者異矣美園茂
林豈與恒地庸山比哉後之寄民社稱嘉吏者雖得
愚民之欲不合智者之心使童子備官而未之聞乎

無德而富貴者固可豫弔也

贊曰後美衡陽前多史君嘉禾瑞麥甘露祥雲民沾
醇酒神感移文撓志如並負心若芥參名吏治異域
同聞

吳中人物志卷之五

吳中人物志卷之六

長洲張景春甫輯

曾孫獻翼論贊

儒林

漢

朱買臣字翁子吳人也家貧好讀書不治產業常刈薪樵賣以給食擔束薪行且誦書其妻亦負戴相隨數止買臣毋歌嘔道中買臣愈益疾歌其妻羞之求去買臣嘆曰我年五十當富貴今已四十餘矣汝若日久待我富貴報汝功妻恚不能留即聽去之邑子

嚴助貴幸薦買臣召見說春秋言楚詞帝甚悅之買臣乘傳入吳界見其故妻妻夫治道乃駐車呼令後車載其夫妻到太守舍置園中給食之居一月妻自經死買臣令葬悉召見故人與飲食諸嘗有恩者皆報復焉

臯弘字奉卿吳人也家代為冠族少有英才與桓榮俱習歐陽尚書事博士九江朱普榮顯宗朝拜議郎使授太子尚書會歐陽博士缺帝欲用榮榮叩頭讓曰臣經籍淺薄不如同門生郎中彭門揚州從事臯弘因拜榮為博士引弘為議郎弘子徵至司徒長史

三國

陸璣字元恪吳郡人仕吳為太子中庶子烏程令撰
毛詩鳥獸草木虫魚疏二卷崇文總目云其書但附
詩釋詁寔窮於采獲似非通儒所為故後世失傳矣
陸景字士仁抗之子好著書尚公主封毘陵侯

鄒邠字伯岐與陸績為同郡人所述太玄連推求玄
本意績嘗為述玄一篇

齊

陸澄字彥淵祖紹臨安太守父瑗州從事澄少好學
博覽領國子博士尚書令王儉謂曰昔曹志繆悅此

官以君係之始無慙德嘗與儉書曰王弼注易玄學之所宗儉自以博聞多識讀書過澄嘗集學士何憲等盛自商略澄待儉語畢然後談所遺漏數伯千餘皆儉所未覩者也儉乃歎服所著地理書及雜傳死後乃出

梁

陸璉郡人天監四年詔開五館建立國學以五經教授置五經博士以璉及平原明山賓吳興沈峻建平嚴植之會稽賀瑒各主一館館有數百人給其廩餼懷經負笈者雲集矣

皇侃青州刺史象之九世孫少師事會稽賀瑒精力
專門尤明三禮孝經論語起家兼國子助教撰禮記
講疏五十卷書成奏付祕閣頃召入壽光殿說禮記
義梁武帝善之加負外散騎侍郎侃性孝日限孝經
二十遍丁母憂還鄉里西平邵陵王欽其學厚禮迎
之大同三年卒年五十八又撰論語義十卷

張充字延符緒弟多所該通尤明老易能清言仕齊
官為侍中義師近次東昏召百官入宮省朝士慮禍
或往來酣宴充獨居省不出閤天監初拜國子祭酒
充長於義理登堂講說時王侯多在學執經拜充朝

服而立不敢當禮

陳

顧野王字希馮吳郡人祖子喬梁武陵王府參軍父
烜臨賀王記室俱以儒術知名野王七歲讀五經知
大旨九歲善屬文嘗製日賦領軍朱异見而奇之十
二隨父之建安撰建安地記長而徧觀經史精記默
識凡天文地理著龜占候蟲篆奇字無所不通宣城
王為揚州刺史野王與琅瑯王褒並為王賓王甚愛
其才野王又善丹青候景亂憂去歸郡召募鄉黨隨
義軍援都野王素羸居喪過毀殆不勝衣及杖戈被

甲陳君臣之義逆順之理抗辭作色見者壯之所撰
玉篇輿地志各三十卷符瑞圖顧氏譜傳各十卷分
野樞要續洞冥記玄象表各一卷及文集三十卷行
于時又撰通史要略一百卷國史記傳二伯卷

陸詡郡人少習崔靈恩三禮義宋梁時百濟國表求
講禮博士詔令詡行還除給事中天嘉初遷尚書祠
部郎中同時晉陵張崖吳興沈德威會稽賀德基俱
以禮學自命

陸慶少好學通五經尤明春秋左傳有節操釋褐梁
武陵王國右常侍歷征西府行參軍除婁令天嘉初

徵為直散騎侍郎不就永陽王為吳郡太守聞其名
欲與見慶辭以疾主乃徵服窺之謂人曰陸君風神
凝峻殆不可測嚴君平鄭子真何以尚鄱陽晉安王
俱以記室徵不起

范平郡人其先銍侯馥避王莽亂適吳因家焉平研
窮墳典該覽百氏詔謚文貞先生三子爽咸泉並以
儒學入官泉子蔚蔚子文才亦知名

張冲字叔玄父僧紹梁零陵太守冲仕陳為左中郎
將覃思經典撰春秋義略異於杜氏七十餘事喪服
義三卷孝經義論語義十卷前漢音義十二卷官至

國子博士入隋為漢王侍讀并州博士

顧越字允南鹽官人所居新阪黃岡家世儒學弱冠
游都下深明毛氏詩尤善莊老至於微言玄旨九章
七曜音律圖緯咸盡精奧初為梁南平王元襄王偉
國右常侍歷安西湘東王府叅軍長七尺三美鬚眉
音響若鍾容止可觀陳武帝時除五經博士歷官國
子越以世路未平無心仕進因歸鄉里栖隱武丘山
與吳興沈炯同郡張鍾會稽孔奐等為文會天嘉中
詔侍東宮讀廢帝即位拜散騎常侍兼中書舍人太
建元年卒所著有毛詩老子孝經論語等義疏四十

餘卷子覽隋祕書學士孫胤有傳

隋

潘徽字伯彥吳人少受禮於鄭灼受詩於施公受書
於張冲講莊老於張譏並通大義尤精三史能持論
陳尚書令江總雅重之釋褐新蔡王國侍郎選為客
館令隋遣魏澹聘陳陳使徽接對之陳滅為州博士
秦孝王俊聞其名召為學士嘗從俊朝京令徽馬上
為賦行抵一驛而成名曰述思賦復令為萬字文又
遣譔韻纂凡三十卷俊薨煬帝時為晉王引為揚州
博士令徽與諸儒撰江都集禮一百二十卷

褚暉字高明郡人以三禮學稱於江南煬帝時徵天下儒術之士集內史省相次講論暉博辨無能屈者由是擢為太學博士撰禮疏一百卷

唐

顧胤吳人永徽中遷起居郎兼脩國史以撰太宗實錄勞加朝散大夫弘文館學士論次國史加朝請封餘杭縣男又撰武德貞觀兩朝國史賜帛五百段又撰漢書古今集二十卷行于世終司文郎中龍朔三年卒子琮武后時為天官侍郎同鳳閣鸞臺平章事卒后曰琮不幸令終雖不舉哀然朕以股肱特廢視

事一日

陸元朗字德明以字行吳人善名理言受學於周弘
正陳太建中後主為太子集名儒入講承光殿德明
始冠與下坐祭酒徐孝克敷經倚貴縱辯衆多下之
獨德明申荅屢奪其說舉坐咨賞釋褐始興國左常
侍陳亡歸鄉閭隋煬帝擢秘書學士大業間廣召經
明士四方踵至於是德明與魯達孔褒共會門下省
相酌難莫能詘遷國子助教越王侗署為司業入殿
中授經王世充僭號封子玄恕為漢王以德明為師
即其廬行束脩禮德明恥之服巴豆劑僵偃東壁下

玄恕入拜床下德明對之遺痢不復開口遂移病成
臯世充平秦王辟為文學館學士以經授中山王承
軋補太學博士高祖已釋奠召博士徐文遠浮屠慧
乘道士劉進喜各講經德明隨方立義徧析其要帝
大喜曰三人者誠辨然德明一舉輒蔽可謂賢矣賜
帛五十匹遷國子博士封吳縣男卒論撰甚多傳于
世後太宗閱其書嘉德明博辨以布帛一百段賜其
家子敦信龍朔中以左侍極檢校右相累封嘉興縣
子致仕終大司成

陸質吳郡人本名淳避憲宗名改之質有經學尤深

於春秋少師事趙匡匡師談助匡皆為異儒頗傳其學由是知名著集注春秋二十卷類禮二十卷君臣圖翼二十五卷並行于代

張後胤字嗣宗崑山人陳國子博士冲之子甫冠學行禪其家高祖鎮太原引為客以經授秦王義興初為齊王文學封新野縣公武德中擢員外散騎侍郎賜宅一區太宗即位進燕王諮議從王入朝召見初帝在太原嘗問隋運將終得天下者何姓荅曰公家德業天下係心若順天而動自河以北指撝可定然後長驅關右帝業可成至是自陳所言帝曰是事未

始忘之乃賜燕月也帝從容曰今日弟子何如後胤
曰昔孔子門人三千達者無子男之位臣翼贊一人
乃王天下計臣之功過於先聖帝為之笑令群臣以
春秋酬難帝曰朕昔受大誼於君今尚記之後胤頓
首謝曰陛下乃生知臣叨天功為已力罪也帝大悅
遷燕王府司馬出為睦州刺史乞骸骨帝見其彊力
問欲何官因陳謝帝曰朕從卿授經卿從朕求官何
所疑後胤頓首願得國子祭酒授之再遷散騎常侍
朱子奢吳人從鄉人顧彪授左氏春秋善文詞隋大
業中為直秘書學士天下亂辭還鄉里後從杜伏威

入朝授國子助教太宗貞觀初高麗百濟同伐新羅連年兵不解新羅告急假子奢負外散騎常侍持節諭旨平三國之憾子奢有儀觀夷人尊畏之二國上書謝罪贈遺甚厚初子奢行帝戒曰海夷重學卿為講大誼還當以中書舍人虞卿至其國納其美女帝責違旨而猶愛其才累遷諫議大夫弘文館學士唐初太廟止四室子奢始發七庙之議帝嘗詔起居紀錄臧否見之以知得失子奢曰陛下所舉無過事雖見無嫌然以此開後世史官之禍可懼也史官全身畏死則悠悠千載尚有聞乎子奢能談辨以經誼緣

飾於帝恩禮甚篤

施士丐其先施之常字子恆事孔子讎為博士延為太尉之孫始為吳人曰然曰績亦載其跡士丐明毛鄭詩通春秋左氏傳以二經教授在太學十九年由四門助教為太學助教由助教為博士秩滿當去諸生封疏乞留太學卒于官昌黎韓愈銘其墓曰施先生云

宋

朱長文字伯原光祿卿公綽之子年十九登嘉祐四年乙科進士第公綽守彭長文不俟燕歸州人榮之

既冠授祕書省校書郎守許州司戶叅軍以病足不
肯從吏趙郊程公綽欲以任恩丐長文幕官長文推
與其季家居二十年安貧樂道無意仕進築室郡中
有山林趣知州章帖表其居為樂圃坊人尊稱為樂
圃先生自郡守監司莫不造請謀政所急士大夫過
者必之樂圃以後為恥名動京師公卿薦以自代者
甚衆天子賢之起為本郡教授時有兩教授以長文
故也時徐積舉於楚陳烈舉於福世稱三先生云
舒雅郡人仕太宗朝為國子監丞太平興國二年詔
同翰林學士李昉等纂脩太平總類以八年書成凡

一千卷名太平御覽天禧中以職方員外郎祕書校理知舒州秩滿主管郡之靈仙觀宰相王欽若言其恬於榮利除直史館

李撰字子約唐宗室也熙寧六年進士為江州彭澤令朝廷下抵田令轉運使倚法務苛擾撰持不可與使者抗論且請就劾并解印綬去使者從之王安禮為部刺史知撰介特薦之元祐三年議遣使脩復小吳河撰上復河賦二篇贊明禹功究當時利害言河不可復通判莫保二州仕終朝奉大夫撰廣孟子說著養氣論三篇其言深切著明別有毛詩訓解二十

卷孟子講義十四卷并文集史論子彌遠

張僅字幾道治平中舉進士與里人顧棠皆為王安石門下士安石作三經義僅棠與焉僅官至著作佐郎卒棠字叔思撰周易義類三卷

陸綰字樞叔常熟人初名絳見前史偶同更名綰舉進士仕終朝奉郎尚書職方郎中所著春秋新解三十卷尤工詩又嘗提舉江淮茶稅蘇洵贈之以詩錢侯字廷碩一字惟大登紹興進士乙科除太學正改宣教郎宗正寺簿太府寺丞乞外知袁州侯於書無不讀尤邃於易著易說三卷并諸經講解十卷

許洞字洞天太子洗馬仲容之子性疎雋幼習弓矢擊刺之伎及長折節勵學精左氏傳咸平三年進士釋褐雄武軍推官嘗詣府白事有卒踞坐不起洞杖之又移書知州馬知節怒其狂不遜會洞用公錢奏除名歸吳所居惟植一竹以表特操吳人爲之語曰許洞門前一竿竹日以酣飲爲事嘗從民坊貰酒一日大署壁作酒歌數百言人爭往觀其酣數倍乃盡捐所負景祐二年獻所撰虎鈴經二十卷除均州叅軍祥符四年祀汾陰獻三盛禮賦召試中書改烏江主簿洞以才學自負狂放不羈與潘閬錢易爲友歐

陽永叔稱其為俊逸之士有文集百卷

林處字德祖父旦仕祕書少監處登紹聖四年進士
歷開封府左司錄以府尹不之禮上章請老歸吳所
居大雲坊有易說書義禮記解并文集摠百餘卷

陸子正郡人授業尹焞之門莆田林光朝試禮部不
第來從子正游專心聖賢踐履之學

王綰字唐公以資政殿學士權太子少傅拜叅知政
事出知越州紹興七年薨謚文恭平生所著有論語
解二十卷孝經解五卷群史編八十卷別有內外制
四十卷奏議三十卷內典畧錄一百卷進讀事實五

卷為人剛正有守立朝無所阿附及居政府祿不乃
親孝養終身自奉甚薄不置第宅晚寓崑山薦嚴寺
蕭然一室無異寒儒

王蘋字信伯世居福州自其父仲舉始家平江蘋為
河南程氏門人資稟清粹充養純固平居恂恂儒者
及語當世之務民俗利病若習於從政者然不徵名
當世世罕知之知府孫佑列蘋學行於高宗朝得以
布衣召見當戎馬間陳說數百言因有通儒之褒仍
賜進士出身除祕書省正字所著有論語集解

顧愚字原魯生值元季儒術湮滅既久抗節不仕獨

抱遺書隱居海上仰綜濂洛微言爲五經說以訓嘗
憑木几讀書兩股跡深入幾寸許篤志不怠 高帝
定鼎金陵命延訪鉅儒一詣轅下復終隱以卒四世
孫啓明好古樂道益修其業事具見介石書院記

陳長方字齊之其先福之長樂人父侁字復之擢進
士第娶林旦女與魏了翁交從甚密了翁謫廣州侁
以長書賀之由此得罪嘗從游定夫學得治身養心
行已接物之要故長方家學有自因外家居吳中步
里紹興間以進士終江陰軍教授所著有春秋禮記
尚書傳漢唐論并步里客談行於世弟少方字同之

孝宗朝為東宮講官亦端介不群之士時稱二陳
楊邦弼字良佐文公億四世孫自浦城來吳從王蘋
學遂居震澤探極理學中紹興十三年進士第三會
行都達太學選為博士兩遷禮部郎以起居舍人出
使金國卒震澤鄉校祀王蘋與邦弼陳長方為三賢
云

章憲字叔度居吳之黃村樂道好德操履高潔鄉里
稱為隱君子嘗受學王蘋游于楊時朱子發呂居仁
諸公間憲遽於春秋宣和中謫監漢陽軍酒稅歿於
兵

黃士毅字子洪嘗入閩謁朱仲晦授以大學章句而
歸正慶元詆排道學時也所著書甚多嘗撰次朱子
書說七卷語類一百三十八卷文集一百五十卷并
自類注儀禮郡守王遂為買宅吳下以居稱為考亭
名士

王誼字正仲一字漢臣著作即蘋之從子師事楊邦
弼以學鳴于時坐刺秦檜貶象州十年歸遂不復仕
著春秋類書

衛湜字正叔狀元涇之弟伯兄沂慶元進士兄洽洙
皆嘉定進士湜亦屢中鎖廳除太府寺丞將作少監

皆不赴嘗為禮記集說百六十卷寶慶二年上之終
朝散大夫直寶謨閣知袁州

吳仁傑字斗南崑山人登淳熙進士第歷官國子學
錄早嘗講學朱子之門所著有古易十二卷周易圖
說樂舞新書廟制罪言郊祀贅說鹽硃論丙丁各二
卷禘祫縣叢書三卷集古易尚書洪範辨圖一卷兩
漢刊誤補遺十卷並行于世

元

俞琰字玉吾其先汴人建炎間始來吳隱林屋山徙
郡城之南園琰生于宋以詞賦稱宋亡遂不復有仕

進意嘗摭諸家易說名曰大易會要一百三十卷及
注上下經并十翼凡四十卷又有經傳考証讀易須
知易圖古占法卦爻象占分類易圖合璧連珠說若
干卷初授温州路學錄不赴後得異人金液還丹之
祕注魏伯陽參同契發揮三卷陰符經解一卷易外
別傳一卷以吾儒性命之學推陰陽消息之理雅好
鼓琴乃作弦歌毛詩譜別有幽明辨惑席上腐談書
齋夜話等書子仲溫孫貞木

陳深字子微吳人宋亡棄舉子業篤志著述有讀易
詩春秋等編尤善筆札

邊景元字長卿宋朝奉大夫珣八世孫以春秋經學
世其家丞相文天祥手書世麟扁其堂景元由池州
青陽縣教諭轉處州路學錄復薦入國子竟以病歸
時長洲學官久廢景元為興達焉子昌字伯盛嘗著
四書節義張氏擬吳以禮招致為官誓不就

丘迪字彥啓其先胸山人五世祖通議大夫松來居
吳遂為郡人六歲而孤甫成童即從舅氏孟潼讀書
廬山白鹿洞嘗以尚書應舉不第所著尚書辨疑若
千卷別有雲麓文稿玉淵雜著其先墓為僧所據至
迪復業焉

俞元變字邦亮其先達寧人曾大父奭通判常州留家焉後復徙長洲元變少貧養母甚孝通蔡氏傳博采群說著集傳十卷或問二卷郡校士子以專經之師授其業者即以䟽通知遠之教屬之變乃謂其徒曰宋亡舉子餘習非經本旨文極則反質矣朝廷取人材於斯文必求諸義理之實乎未幾延祐科舉詔下多如所云而元變於省試不屑也既卒虞文靖公為其葬銘子安國

湯彌昌字師言父暉老咸淳丁卯龍飛榜進士父子授受皆以周禮發解所著有周禮解義別有碧山類

稿湘江權歌詳載史官歐陽玄所為墓銘

王元杰字子英吳江陳思村人至正甲申以春秋領鄉薦值兵亂隱居教授遂不果仕所著有春秋讞義若干卷嘗經進刻梓行世并其集曰水雲清嘯而康里子山序之者子思忠

顧諒字季友吳江越溪人生元季隱晦不仕嘗註儀禮行于世王行為作傳

吳簡字仲廉吳江桃墩人在元鄉試不第尋膺薦授郡學訓導陞紹興府學錄所著有詩義并論語提要史學提綱年八十三卒子二復頤見薦舉

余日彊字彥莊古田人父與可武夷書院山長始來
吳居崑山其學淹貫根柢六經不為異說所著尚書
補註若干卷平生有隱操

陳謙字子平吳人甫兒時即知孝事父母年三十始
授室悛悛色養退則率諸生講說周孔脩齊之道父
疾思食鰕進鰕而父沒謙終身不忍食嘗師事林處
士寬勉以業試有司就塲屋屬吏卒搜檢懷挾者待
士無狀因難曰道喪至此尚何傲倖失得為哉即弃
去刻意古學在朝諸老交口論薦宜任著作力謝乃
止京口孫子翼有女貧不能嫁謙嘗許之助後十年

子翼病即挾貲遠至京口為畢其嫁後救兄死于兵
所著有周易解詁別為河圖說一卷占法一卷

邵光祖字弘道父宦游來吳因家焉性孝友見有弗
順於親者輒怒斥之於朋友无篤信義博學好古研
精經傳夙夜講習垂三十年遂通三經皆有疑義又
著尚書集義六卷於字學尤精研窮六書之旨采諸
經騷語古韻偏傍以從古文辨聲音而因字母著韻
書四卷其教諸生有欲習科舉者皆弗許尤以闢異
端禁邪說扶植名教為務有以先賢康節子孫論薦
于朝不報張士誠據吳授湖州學正亦不赴遂以布

衣終其身

國朝

殷奎字孝伯一字孝章其先華亭人居崑再世俗尚貨殖父始為市書遣從會稽楊維禎遊州人笑以為迂志不為變復買田婁上益資之學奎少勤敏刻苦不墜父訓 國初改立學法洪武四年以薦者赴吏部試春秋題道統論置之高等例授郡縣奎請便侍養因弗當道遂調咸陽教諭時咸陽久罹兵革士不知學奎徃任文教大行藩省禮聘考試多士及纂脩關陝圖經卒年四十六

徐達左字良輔早失怙恃年十六始知書從邵光祖
精于義理之學遭時多故隱居光福山中躬行孝悌
以身率教其族之子弟講論禮樂彬彬揖讓洪武二
十二年聘為達寧學訓導以朱子關里欣然往就達
左質厚氣溫未嘗談人過犯之亦不畱怨好山水嘗
游武夷將歷覽以廣見聞平生所著有顏曾思孟四
子書刻畱家塾

陳桎字子經其先四明奉化人祖著宋祕監知台州
著書四明山中父泌元饒州教授桎與兄朴字子章
徙居于吳之陽山桎精于史學洪武初斐然以著述

為已任召起程為起居注

林大同字逢吉常熟人幼孤貧自力於學凡經史手
自抄讀寒暑不懈嘗著易經與義洪武中由明經任
開封府學訓導病歸永樂三年再召用力辭受宴賜
還

張洪字宗海常熟人年十一以民間俊秀充儒學生
洪武乙丑以事被逮坐戍雲南帥臣遣子從學久之
以明經薦授靖江王府教授永樂元年擢行人奉使
日本却其餽金二年復使遼東入翰林脩大典充副
總裁官書成燕賞甚厚所著有四書解義二十卷周

易傳義會通十五卷尚書補傳十二卷詩經正義十
五卷小學翼贊六卷其雜著則有貫道集永言集攬
轡集

吳訥字敏德常熟人洪熙初經明行脩薦擢監察御
史尋陞南京左副都御史致仕訥持行高古凡經傳
多能刪撫舊註發明正學為文公小學集解刊行於
時卒後追謚文恪公

論曰漢室以儒術禮義為官遷留滯卿大夫以經術
潤飾吏事學者咸尊夫子之業而潤色之又注意高
仰之不循春秋至比於弑逆先師褒勵之功篤矣切

矣自是人識君臣父子之綱家知違邪歸正之路儒
行之士彬彬焉即蜀地僻陋有蠻夷風今巴蜀好文
雅文翁之化也况南人簡約得其英華者乎逮夫近
古巨儒鄙俗截道颺則俯拾青紫敦詩書則坐委莫
澤盖利祿之路然也志識之士安肯滯于所習以求
貧賤哉儒罕通人儒者之風盖衰矣俗疵文雅誰其
化之當年若婁羞之而誦聲不輒買臣之奮于前也
人笑之而志操不變孝伯之屬於後也經籍讓同門
以不如酣宴居省閤而不出商畧皆未覩之語講論
無能屈之賓賦抵一驛而成經自七齡而悟贊一人

而王天下功過宣尼撰二篇以止復河績希神禹凡
有撰述莫不推其通博目為宗匠雖容體不足觀勇
力不足恃族姓不足道先祖不足稱莫不顯聞四方
流聲後裔矣况容止則顧越介特則李撰門業則顧
野王祖德則楊邦弼一何偉與是以涉其流者無祿
而富懷其道者無位而尊雖顧諒之不仕吳簡之不
第固已處環堵而輕富貴在陋巷而茂王侯矣

贊曰魯儒一人持領振裘弟子遂之散遊諸侯漢實
稽古闕文採求各禮行誼洞微究幽通心來哲記志
前脩方領委它莫與為儔同門猶讓伉儷則羞何尚

嚴平徒難孔褒釋褐新蔡樓隱武丘文為萬字史秘
千秋從容雅望藉甚風猷

吳中人物志卷之六